

von Wulf Wager

## Gaulsfloisch



So lang isch's no gar net her, do hätt mr sich alle zehn Finger abgeschleckt, wemmr überhaupt a Stickle Floisch kriegt hätt. Egal ob von dr Sau, von dr Kuah oder vom Pferd. Nadierlich isch des Betrug, wenn Rind drufstoht, aber Gaul dren isch. Aber es ischt net gesundheitsgepferdend. Bschissa werdat mr doch ibrall, oder net. Wie hoißt der alde Spruch: "Wenn des rauskommt, was en d' Wurscht neikommt, no kommt dr Metzger wo nei, woner nemme rauskommt!" Ond uf de Fildra hot's frieher ghoiða: "Wenn en Boolanda a Haozich gfeiert wird, fehlt en Platterdt a Hond!".

Dr Skandal weitet sich aus. Selbscht en Fischstäbla hend se scho Spura von Seepferdla gfonda. I muaß ehrlich saga, mir isch liabr, 's isch Pferdefleisch en dr Lasagne als Tofu. Mo muaß sich do net so aufrega. Wenn d' Lasagne jetzt teurer wird, liegt des eideutig an dr galoppierenda Inflatio. Lasagne lauft aber emmr no guad. Bei Edeka om d' Eck war se geschtern ausverkauft - oder ausgritta?

I ka wenigstents saga: Mei Lasagne hot bei Olympia 2008 Silber en dr Dressur gholt! Wenn des nix isch?

Selbscht dr McDonalds goht mit dr Zeit. Ab näggschd Woch gibt's das MacFury. Wahlweise in de Gschmacksrichtunga Hengst oder Stute.

Mr kann Pferdelaasagne ibrigens ganz leicht erkenna. Dr Nährwert wird auf dr Packung net in Kilokaloria sondern in PS a'geba. An Guada mitnandr!

Bis näggschd Woch'

Ihr Wulf Wager

Alle Kolumna zom Nochlesa

onder: [www.woascht.de](http://www.woascht.de)